

2453

DISCOVERS
SVR L'ESTAT
LAMENTABLE DE
LA VALTOLINE
adressé au ROY.

*Representant la pauvreté où ils sont
reduits pour le present.*

M. DC. XXIII.

X

Case


F

39

326

1623 26

THE NEWBERRY
LIBRARY



DISCOVRS
SVR L'ESTAT
LAMENTABLE DE
LA VALTOLINE
adressé au R o y.



'E s t chose notoire à tout le monde, comme la France & l'Espagne, les deux plus puissantes Courônes de l'Europe, ont dès l'og temps pour diverses raisons importantes à leurs Estats, & qui leur sont assez cognues, travaillé en concurrence par tous moyens possibles de s'obliger & vnir par Alliance les Cantons des Lignes de Suisse, & les confœderez d'iceux.

En quoy la France a tousiours esté preferée à l'Espagne, & a tenu bon contre les recherches dignement eludees de temps en temps, iusques à ce que celle cy se preualât

de l'occasion des guerres ciuiles allumees il y a environ 37. ans en France par la Ligue : auroit en fin obtenu & conclu vne alliance avec les sept Cantons Catholiques, quiluy auroit apporté tels aduantages & commoditez au preiudice de la Frâce, que biē goustés & recognus par les Espagnols ils auroient depuis vüe à passer plus outre, & par pratiques continuelles recherché la mesme alliance avec les trois Ligues des Grizons frontieres du Duché de Milan d'vn costé, & du Tyrol de l'autre, & employé toutes sortes de moyens & de sollicitations, voire de menaces, tant en general qu'en particulier, pour paruenir à ce but & dessein tant par eux desiré.

Mais les genereuses & fortes oppositiōs des Seigneurs Ambassadeurs de Frâce par longues années, & les exhortations cordiales de quelques Cantons de Suisse qui en auroient avec vives raisons destourné les Grizons & par lettres & par deputez, comme aussi l'ancienne inclination de ces peuples Alpins au party de la France, auroient rendu tous les efforts & traités d'Espagne vains & inutiles.

Ce que voyans les Espagnols (qui ne demordent pas aisement de leurs premiers

conseils & desseins) ils prennent resolution pour venir à bout de leurs intentions de se porter à des remedes plus violents, & de se servir du pretexte de la Religion duquel ils ont souuent coloré leurs desseins & usurpatîōs: de maniere qu'avec l'ayde & intelligence de quelques bannis, traistres scele-rats, & ennemis iurez de la patrie, & d'un nombre de perfides & desloyaux suiets de la Valtoline, ils se donnent entrée en iceluy pays, par le moyen de ce barbare & horrible massacre, commis & perpetué par surprise au mois de Juillet 1620. dans plusieurs Eglises, & autres lieux de la Valtoline, sur des pauvres innocents, sans aucun respect de sexe, ny d'age, ny de consanguinité, n'y ayant sans doute oreilles en la Chrestienté si estoupees, qui au moins n'ayent esté penetrees du bruit retentissant d'une telle barbarie, plus que Payenne & tygresque; qui se trouue descrite ailleurs. Faisans donc voile sur ce fleuve de sang qui crie encor vengeance à Dieu, les voila qui se rendent maistres de la Valtoline & de Bormio.

Desastre qui a traîné en suite la perte du Comté de Chiauenne, & l'entiere oppression de l'ancienne liberté des Grizons, lesquels ayans esté depuis enuahis hostilemēt

de tous costez par les troupes & armées des Espagnols & de ceux d'Autriche, ont esté violemment contraincts par le Gouverneur de Milan, d'accepter tout ce qu'il leur a voulu prescrire, voire beaucoup plus qu'il ne demandoit du commencement, entant qu'il les a fait renoncer non seulement aux pays soiets de la Valtoline & autres, mais aussi à vne partie de leur propre pays franc & libre, qui est du corps mesme de la Republique: Exemple de la protection des rebelles, qui à jamais sera preiudiciable, pour la consequence à tous Royaumes, Estats & Seigneuries, & qui tourne à la grande honte, dommage, ruine, & mespris de tous les alliez & confederez des Lignes Grises. Les vns desquels sont maintenant les plus proches & voisins de ceste oppression, & les autres (i'entends parler de la couronne de France) sont ouuertement moquez, & les plus interessez en leur reputation, & sur tous autres mesprisez en cet affaire: comme ainsi soit que S. M. Tres-chrestienne ayant par vne singuliere clemence pris en main la cause, & l'affliction de ses alliez Grisons, & non seulement par ses Ambassadeurs ordinaires en Espagne, mais aussi par vn extraordinaire Mōsieur de Bassompierre moyē-

né & fait conclurre la restitution de la Valtoline, & le reſtaſſement de toutes choſes en leur premier eſtat, au contenu des articles accordez le 15. Avril 1621. à Madrid entre les deux Maieſtés, leſquels ſe deuoient exécuter promptement. neantmoins on ait ſceu avec tant d'artifices gagner temps, en adiouſtant (pour eniter l'exécution promiſe, delais ſus delais ſous des vains & friuoles pretextes) que finalement le tout ſoit honteuſement eſuanouy, & allé en fumée. Et bien pis, qu'au lieu de rendre la Valtoline, pays ſuiet aux trois Lignes Grises, on ait encor oſé au veu & reſpect de la France, & de tous les Princes & Eſtats voiſins, ſubiuguer & opprimer tout le reſte de ceſte République.

Or les articles de Madrid (acceptez par les Grizons & par leurs allies, quoy que la condition de pardonner à ces meſchâs rebelles & cruels massacreurs ſembloit aux bons Magiſtrats & patriotes bien dure) eſtoient tels.

I. Que toutes choſes ſeroient remiſes en leur premier eſtat tant d'un coſté que de l'autre, de maniere que tous les ſoldats qu'on auroit leué nouuellement ſeroient congédiés, reſeruez du coſté de S. M. Catho-

lique seulement ceux qu'elle auoit deuant ces troubles.

II. Que les Seigneurs Grizons ottroyeroyent pardon general aux rebelles & malfaiteurs de la Valtoline, Bormio & Clauenne, tellement qu'ils ne soyent chastiez ny aux corps ny es biens, ains le tout mis en oubly.

III. Que touchant la religion, seroit leuee & ostectant seulement la nouité laquelle auroit esté introduite au preiudice de la Catholique Rom. depuis l'année 1617.

IV. Que lesdits Seigneurs Grizons rarifieroyent, moyennent vn sermēt authentique & conuenable, ce qui a esté conclu & déterminé: que S. M. Tres-Chrestienne & Messieurs les 13. Cantons de l'Heluerie commune & ceux du pays de Vallay, où la plus grand part d'iceux, procureroyēt que tout cela soit maintenu & obserué.

V. Qu'en outre le President de la Franche Comté, l'Ambassadeur extraordinaire de S. M. Tres-Chrestienne, & le Nonce du Pape, deuroient s'assembler à Lucerne au dernier de May anno 1621. pour executer cet affaire, dont deux copies correspondantes vne en la langue Françoise, l'autre

tre en la langue Castilienne seroient baille es à chacune partie.

Tant s'en faut doncques que ces articles soient executez, comme dit a esté, qu'au contraire le gouuerneur de Milan conuient par vne secreete intelligēce avec l'Archiduc Leopold qu'il deura attaquer les Grizons lous pretexte de quelques siennes vieilles pertensions sur la vallee de Munster, basse Engadine, & les huit Droitures soit Iurisdietions (qui font la 3. Ligue des Grizons.) Lesquels pays en effect il enuahit & subiugue avec quelques autres communes de la Ligue de la Caddée par force ouuerte de guerre contre l'expresse teneur du traité de paix perpetuelle soit hereditaire que les Grisōs ont avec la maison d'Austriche, qui porte que les deux parties ne feront iamais aucune chose l'une au preiudice de l'autre, & que tous actes d'hostilité sont deffendus. Mais que suruenant quelque different & mes-intelligence entre icelles, le tout deura estre decidé & terminé par voyes communes de iustice equitable, soit par des Iuges neutres qui seront nommez & choisis par les parties.

Nonobstant quoy ledit Prince Leopold a mis la main presque sur toute la troisiē-

me Ligue, & plusieurs iurisdicțiuni de celle de la Caddee, les desmēbrant ainsi du reste du corps des Grisons, qui depuis vne infinité d'annees estoit si bien vny & cōioint par vne confederation & alliance perpetuelle & inseparable avec formel consentement des Princes d'Austriche, lesquels mesmes se sont obligez & liez par sermens prestés avec execration à diuerles fois pour eux & leurs successeurs quelconques, de vouloir garder & obseruer inuiolablement le traitté susdit à toute perpetuité, sans qu'au reciproque on ait iamais eu intention de desroger aux droits des Seigneurs directs, pourueu seulement qu'ils laissent ladite Ligue & iurisdicțiuni susdites en la iouissance de leurs droits, libertez, coustumes, immunitiez, & franchises anciennes, desquelles ils ont iouy de tout temps sans contredit, & qui furent solennellement confirmez aux huit Droitures par les Seigneurs Barons de Vatz, Comtes de Toggenbourg, Vverdenberg, Monfort, & de Mættsch, & finalement par l'Archiduc Sigismond, par les Empereurs Romains Maximilian I. Charles V. Ferdinand I. & son fils l'Archiduc Ferdinand, par Rodolphe II. Et dernièrement par Maximilian Ar.

chiduc d'Austriche, tous de tres-glorieuse memoire pour eux, & tous leurs heritiers & successeurs quelconques.

Qui plus est, ils ne se contentent pas d'auoir desmembré les huit Droitures & quelques Cōmunes de la Caddée du reste des Liges Grises, mais encor ils leur ont fait solennellement abiurer toutes autres alliances & confœderations avec serment de n'en traiter à l'aduenir, & par tels artifices les ont allienés & diuertis du party de la Couronne de France, & ont tout à fait annullé ceste si ancienne alliance avec la France, qui auoit continué & subsisté de puis tant d'années, avec si grand aplaudissement & resiouyssances, à l'honneur, bien commun & singulier contentement des deux parties. Alliance dis-ie fomentee & entretenüe par l'honneur d'vne residence continuelle des Agents & Ambassadeurs de France dans le Pays & par vne suite de beneficences & largesse dignes de la puissance d'vn si grand Monarque, auxquelles ces peuples auroyent tasché de respondre par tous prompts & fideles seruices en diuerses notables occasions suivant le deuoir de l'alliance. Qui fut quant à la premiere, establie par

le Roy Charles VII. le 4. d'Auril en l'an 1453. à Paris avec les Cantons des Suisses confirmée dans Abbeuille le 27. Novembre 1463. par Louys XI. son fils & successeur au Royaume. Du depuis renouvelée avec addition de plusieurs articles: & faire par le mesme Roy non seulement avec les Suisses, mais aussi avec les Grisons & autres leurs alliez, & ainsi inuiolablement a elle esté observée iusque au regne du Roy tres Chrestien à present regnant. Car Charles fils du Roy Louys susdit renouvela ceste alliance en l'an 1499. Celle qui est entre sadite Maiesté & les Ligues Grises fut aussi par le mesme Roy Charles renouvelée à Cremone en Italie le 14. Iuin 1508. le Roy François I. son gendre fit vn traité de paix perpetuelle avec les Cantons des Ligues de Suisse, & leurs alliez à Fribourg la veille de S. André l'an 1516. En apres l'an 1521. & le 7. May il fit alliance à Zurich avec tous les Cantons de Suisse, excepté Zurich, & avec la Ligue Grize. En laquelle alliance entra aussi puis apres la Ligue de la Caddée & celle des dix Iurisdicions le 5. Feurier 1527. en la ville de Coire. Et l'an 1549. la mesme alliance fut renouvelée par le Roy Henry

II. fils du Roy François I. & le mesme fit Charles IX. en l'an 1564. Henry III. l'an 1582. & finalement l'an 1602. Henry IIII. qui pour les faiçts heroiques a esté meritoirement surnommé le Grand, lequel y voulut comprendre son fils premier né lors Daulphin de France, & à present Roy Tres Chrestien; Auquel on a rendu inutile ceste alliance, tant du costé de Milan que de Tyrol par la violence des armes Espagnoles & d'Austriche, non seulement au regard des 8. Droitures & de quelques Communes de la Ligue de la Caddée, mais aussi pour le reste des Grizons où ne paroist plus que l'ombre & le nom, supplantez & opprimez en effect.

Mais à fin que l'on voye les artifices des, quels se sert le gouverneur de Milan ne faisant estat d'aucun Traité. Au temps qu'il deuoit executer les articles de Madrid, n'entreprit-il pas de se rendre maistre du Comté & Seigneurie de Clauenne appartenante aux Grizons? Car pour cest effect il fit monter le Capitaine Vassallo avec ses gens d'un costé de la riuiera appelée Meyra par dedans les terres dudit Comté, & tirer droit vers Clauenne, lequel deuoit estre suiuy & secondé par vn gros de

Neapolitains & Milanois qui deuoyent marcher en mesme temps de l'autre costé de ladite riuere, mais d'autant que ceux-cy se trouuerent embourbez dans les sablons à l'endroit où la riuere Ada se discharge dans le Lac, vne partie y estant demeurés, & les autres empelchez à sortir leurs compagnons, ils ne peurent arriuer & le trouuer à poinct nommé à ceste entreprise, de sorte que le Capitaine Vassallo estant approché, ceux de la garnison de Chiauenne tous Grizons firent vne sortie, où il fut desfait & mis en fuite avec toutes ses gens & luy mesmes tué. Et ainsi pour l'heure s'esuasnouit ceste entreprise.

Les Grizons donc se voyant bien esloignez de l'execution des articles de Madrid sur laquelle on les amusoit, puis que tout au contraire le Gouverneur de Milan par actes d'hostilité les venoit enuahir en leur pays, & ainsi donnoit assez à cognoistre qu'il ne faisoit aucun estat desdits articles non plus que d'une carte volante, se resolurent de reprendre leur propre pays & subiets si possible estoit, sur leurs ennemis, & d'entre les mains de leurs perfides & desloyaux rebelles, pour euitier vn plus grand progrez dans leur

pays, ainsi que l'on auoit desia entrepris de faire, pendant & durant la negotiation pour l'exécution dudit traité de Madrid. Mais afin de n'ombrager aucunement ledit Gouverneur de Milan, & qu'il ne pensast qu'on voulut entreprendre contre son Estat, ils s'esloignerent le plus qu'il pourrent des confins du Milanois & firent leur entrée vers Bormio. Et combien que pour lors rien ne fut effectué de consequence par lesdits Grisons, qui pour diuers defauts se retirent en leurs maisons, neantmoins ledit Gouverneur en personne se remit tout aussi tost en campagne & entra avec les meilleures forces dans le Comté de Clauenne qui estoit gardé par petit nombre de gens, qui n'attendoient rien moins que cela, sur les nouvelles & continuelles esperances qui estoient données d'une finale execution dudit traité de Madrid, & ainsi prit par force & hostilement la Seigneurie & Comté de Chiauene & de là entra en Bregaglia communauté du pays & autres lieux circonuofins qui furent tout mis à sac, à feu, & à sâg. Et tout cela pour ceste principale fin de demeurer Seigneur & Maistre des passages & des Alpes, & de retirer les Grisons

du party de France pour les ioindre & attacher à celuy d'Espagne : & pour ne point douter de cela, il ne faut que regarder le fonds de l'affaire.

Car apres la rebellion suruenüe comme dit est en la Valtoline, on fit incontinent leuee du regiment du Colonel Beroldin-guer Suisse, lequel on fit entrer dans la haute Ligue, pour prendre garde (disoit-on) à la seureté des Grizons suivant le traité d'alliance qui est entre les Signeurs & superieurs & lesdits Grizons, & leur ayder à recouurer le pays de la Valtoline. Cela à la verité eust deu estre fait mais puis que luy & son regiment estoient payez par le Gouverneur de Milan, il ne pouuoit s'employer contre les rebelles de la Valtoline qui tiroient toute leur assistance, secours & protection du Milanois. Et les effects ont assez tesmoigné quelle estoit leur intention. Car par le moyen dudit regiment, ledit Gouverneur fit faire escorte à ses creatures les bannis des Grizons qui auoient entrepris d'introduire l'alliance d'Espagne à l'exclusion de celle de France, & par l'entremise desquels il obtint des Communes de la haute Ligue, qu'ils enuoyeroient des Deputez à Milan, ce qui fut effectué & par-

my eux se mēsserent des bannis, lesquels conclurent vn traité avec le Gouverneur de Milan en faueur de l'Espagne, nonobstant qu'ils fussent incapables de ce faire, estant obligez par serment de ne rien faire sans le consentement des autres deux Ligues; Puis quand il fust question de presenter ce traité aux Communes de la Ligue Grise pour estre ratifié, ils firent venir grand nombre de soldats armez du susdic regiment en la presēce de l'assemblée, lesquels forçoient & violentoient ceux qui estoient contraires, & qui vouloient tenir bon pour l'alliance de France avec menaces de les perdre & ruiner. Et ainsi par la necessité qui leur estoit imposée, l'affaire passa, & fut ledit traité de Milan ratifié par force au tresgrand preiudice de l'ancien traité de la confédération des trois Ligues, qui est la loy fondamentale de tout l'Estat des Grisons. Mais comme ce fut vne chose violente & introduite contre le serment, obligations & formalitez portees par ledit traité de la Ligue, elle ne fut pas de longue durée, pource que les deux Ligues entrèrent avec main armée en ladite Ligue Grise & firent reuoquer le tout en mesme temps.

Ce neantmoins le gouverneur de Milan non seulement ne desista point de sa poursuite, mais s'eschauffa de plus en plus à l'aduancement de ses desseins, & voyant que sans grandes forces il n'en pouuoit venir à bout, il employa & estendit la puissance de ses armes & de celles d'Austriche si auant par establissement de garnisons és meilleurs endroits de Grizons, & par violence ouuerte enuers les deputez Grizons, qu'en fin il obtint la renonciation de la Valtoline, & vn traité plus estroit qu'il n'eust iamais osé esperer. Car quand les deputez refusoient de faire ce qu'il vouloit, on les menaçoit de poursuiure & employer les forces d'Espagne contre eux iusques à l'entiere ruyne & desolation du païs des trois Liges: par ce moyen non seulement il fit chanter les deputez selon le ton qu'il leur voulut donner, mais aussi fit faire aux Communes oppressees par les troupes estrangeres, tout ce que bon luy sembla.

Et combien qu'en apparence il semble qu'en l'vn des articles du traité de Milan on reserue avec beaucoup d'artifice l'Alliance de la Couronne Tres-Chrestienne, toutesfois ce n'est que par forme & en pa-

roles, mais en effect elle se trouue du tout cassée, annullée & enervée comme chacun de sain iugement pourra voir, qui voudra conferer ladite Alliance de France avec ce traitté nouveau & perpetuel d'Espagne & Austiche fait à Milan, & avec le traité de renonciation à la Valtoline qui ont esté publiques & imprimées à Milan, à la seule lecture desquels tous bons François ne peuuent que s'offenser grandement & s'esmerueiller d'une si hardie vsurpation & innouation au preiudice de l'interest & autorité d'un Roy de France.

Mais il s'en trouuera qui s'estonneront pourquoy les Espagnols & ceux d'Austrie ont employé tant de forces, & si grandes despeses pour venir à bout de cet affaire & pour acquerir la domination des Alpes, lesquelles de leur nature sont steriles, & veu que la nation Grisonne n'est pas des plus grandes & puissantes, & leur pays si rude & sauvage qu'on n'en peut pas esperer & tirer grand profit ny aucun reuenu d'importance. Mais quiconques prendra l'affaire au fond & considerera l'affiète de ce pays & l'incroyable commodité des passages, il verra bien tost que les Espagnols ont bien sceu faire leur compte.

Ils disent puis que leur Roy s'appelle Catholique, qui est autant à dire qu'Vniuersel, qu'il est aussi raisonnable qu'il soit, tel non seulement de nom, mais aussi en effect. Ce qui ne peut estre sans la suppression de tous les autres Royaumes, Principautez, Estats & Seigneuries & que par tant il n'y a autre meilleur moyen pour paruenir à ce dessein, que le fait qui s'est pratiqué aux trois Liges Grises, comme plus amplement a esté représenté par plusieurs fois au Roy d'Espagne avec de fortes & vives raisons tant par escrit que de bouche par le gouuerneur de Milan & autres grands personnages d'autorité & de reputation, qui en reuiennēt tous là, que le Roy Catholique peut entrer par ceste porte & par ces Alpes à la domination generale, & effectuellement former la Monarchie vniuerselle par luy pretendue des long temps, & à laquelle il se va achemināt tantost d'un costé, tantost de l'autre, si par le contre-poids de la Monarchie Françoisse n'y est remedié de bonne heure.

De fait, l'Espagne ayant les Grisons à sa deuotion, elle & la maison d'Autriche ont tous les passages de la Suisse pour entrer & sortir d'Italie à leur commandement.

Par ce passage la porte est ouuerte à la conquête de plusieurs autres provinces, & d'autre costé par ce passage fermé sont asseurez les Estats des Espagnols. Derechef par ce moyen ils tiennent tout ce qui est en Italie sous leur puissance & demeurent seuls Arbitres de toute l'Italie, n'y ayant Prince ny Estat, soit seul, soit cōjointement avec les forces d'autrui, qui leur puisse résister. Le Pape mesmes duquel à l'entrée de la Valtoline on a emprunté les bannieres pour authoriser le pretexte de la Religion, se trouue en fermé deuant & dernier, & sera contraint bon gré mal gré qu'il ait de tousiours s'accommoder aux volontez de l'Espagnol; qui sera bien content luy laisser la Monarchie vniuerselle spirituelle, pourueu qu'il se retienne la temporelle. Brief ces pays & passages des Grisons sont le droit & fort court chemin d'Italie en Allemagne, de l'un à l'autre reciproquement, & seruent d'un grand abbrege de chemin à l'Espagnol pour ietter ses armées d'Italie en Allemagne, lesquelles cy deuant estoient obligées faire un grand destour, & ainsi occupés & possédez par l'Espagnol toutes les Principautez, Estats & puissances de la haute & basse Allemagne peuuent estre surpris,

& enuahis' & subiegez à l'impourueu, & ceux qui se trouuent le plus proches des Alpes en situation, seront tant plus en danger de telles inuasions. Et par ceux sera fait le chemin aux autres plus esloignées provinces.

Or estant les Couronnes de France & d'Espagne les deux equilibres de la Chrestienté, il n'y a point de doute, qu'à mesure que l'Espagne s'accroist en grandeur & puissance, la France en diminue d'autant, & tombe non seulement en vn mespris odieux, mais en tel Estat qu'elle ne se pourra pas meismes asseurer de sa propre conseruation, comme sera monstré cy apres: elle cependant qui aux siecles passez estoit en reputation d'estre l'Arbitre de l'Italie, l'ayant par fois deliurée avec de trespuissantes armées, par fois avec la seule apprehension de ses armes, de la main de ceux qui la vouloient enuahir: Et cōbien que la Couronne de France soit presque seule demeurée des longues années comme maistresse des passages des Grisons par le moyen de ses Alliances, ç'a esté néantmoins sans aucun danger ny apparence d'abus au dommage d'autrui, puis mesme qu'elle ne possède aucunes terres ou seigneuries aux enuirōs,

Ains seulement pour la propre conseruation & protection de la Republique des Grisons & des autres Estats voisins: Au lieu que l'Espagnol & la maisõ d'Autriche qui du costé de Milan & de Tirol affrontent ledit pays, affectent la dominatiõ de ce passage pour leurs propres interests & au grãd preiudice des autres Princes & Estats voisins qu'ils tiendront en Alemagne & sur tout en Italie resserrez & bloquez à leur appetit & volonté.

Bien plus, si vn Roy d'Espagne vouloit mesme entreprendre sur le Royaume de France, comme iadis il a fait, ayant occupé des plus gandes & meilleures villes sous la derniere Ligue, ne pourroit-il pas pratiquer quelque Prince François malcontent pour brouiller & troubler le Royaume sous quelque pretexte, & en apres faire excommunier par le Pape (lequel il tiendra du tout en sa puissance par le moyen de ce passage comme dit est) le vray & legitime Roy, & absoudre ses suiets par le lien de leur concience, du deuoir naturel qu'ils ont à leur Legitime souuerain pour leur faire embrasser le party d'un nouveau Roy? L'argent & les gens de guerre d'Espagne n'aideront-ils pas aussi à faire iouer

les reffors d'une telle entreprise, voire avec si grande puissance, que personne ne luy pourroit resister ?

On laisse doncques à iuger à tous bons François & plus clair-voyans pour ces raisons & autres infinies qui pourroyent estre plus amplement deduites sur ce suiet, s'il est raisonnable de permettre au Roy d'Espagne vn tel aduantage par dessus tous les autres Royaumes & Estats, tât Ecclesiastiques que seculiers du monde.

La France est la plus interessée en cet affaire, puis qu'il concerne ses plus fidelles & affectionnez seruiteurs & alliez, qu'elle s'est obligée de les deffendre & maintenir contre toute violence & oppression en vertu des traitez d'alliance & confœderation, qu'elle ne doit permettre que traitez si solennels soient rendus illusoires, rompus ou alterés au moindre point, & les accords enneruez & annullez, les priuileges, & libertez des peuples supprimées, leurs passages vsurpez au preiudice de toute la Chrestienté, leur Estat entier ruiné, & la plus part d'eux asservis sous le ioug Espagnol. Dieu maintient les grand Royaumes & affermit le trosne des puissans Roys, afin que principalement ils secourent & assistent les foibles

bles en leur droit contre ceux qui les veulent opprimer.

L'honneur & reputation de la Couronne de France y demeurent spécialement engagés, puis qu'on luy a promis à Madrid de restituer la Valtoline & de remettre le tout en son premier estat. Ce que tant s'en faut qu'on ait effectué, qu'au contraire par vne pure mocquerie & mespris de la Couronne on s'est emparé presque de tout le residu du Pays, avec vn entier aneantissement de l'alliance de France.

Laquelle neantmoins a bien eu iadis le pouuoir & le credit, cōme tesmoigne l'histoire des guerres d'Italie, que de faire entrer les Grizons en possession de ceste mesme Valtoline, & dernièrement de faire restituer Vercel apres quelques delays au Duc de Sauoye, puis qu'ainsi luy auoit esté promis & accordé par vn traité nō plus authentique que celuy de Madrid. Et ce seroit vn affront trop signalé à vne Couronne si puissante que de souffrir que la parole donnée à ses Ambassadeurs & mise par escrit soit si honteusement enfreinte & violée : Son ancienne vigueur & valeur qui faisoit trembler tous ses voylins, n'est point racourcie, ny diminuée.

Et comme elle seule peut remettre les peuples desolés des Grisons en leur première liberté, tant plus grande aussi sera l'obligation qu'ils luy auront de leur deliurance, ensemble tous autres Estats qui pour la conséquence de l'ouuerture des passages sont exposez au mesme danger.

Ce sera vne action glorieuse de ne souffrir point qu'un tiers demeure Seigneur de ce pays pour s'en seruir au preiudice & dommage de toute la Chrestienté, & que ceste Republique si libre & si ancienne, & ceste valeureuse nation tant recommandée par l'antiquité soit precipitée dans l'abyssme de seruitude.

Les Espagnols pour excuser & pallier ceste usurpation vont publiant que les Grizous ont consenty volontairement à tant d'enormitez & de preiudices : mais ce pretexte n'est de mise, veu qu'en effect, & selon la pure verité il se trouuera qu'ils y ont esté trainés par force, tant au commencement, comme il a desia esté monstré, qu'en la conclusion de la negotiation selon qu'il s'ensuit.

Car comme la ratification des articles donnés à Milan au mois de Ianuier dernier, estoit attenduë des Communes de la

Ligue Grise & de la Caddee , & qu'elle estoit differee plus que n'eust pensé le Gouverneur de Milan (pource que les peuples des Grisons en faisoient difficulté s'y sentans fort greuez) iceluy Gouverneur despescha en grand haste vn certain Iules Cesery au pays des Grisons , pour leur protester de sa part . que la ratification n'estant promptement faite & remise, il s'en alloit sans aucune grace mettre à feu & à sang toutes les Seigneuries & Communautéz qui en feroient refus, & en donner l'exécution aux troupes d'Austriche qui estoient au pays & au susdit Regiment du Colonel Beroldinguer. Lequel estoit sur les frontieres de la Ligue Grise, & aux compagnies Espagnoles logees à Chiauenne : par ainsi les pauvres peuples tous espouuantes l'auroient finalement ratifié par violence & par force manifeste & contrainte, qui est bien le contraire d'une franche volonté & d'un libre consentement tel qu'il est requis en matieres d'importance & d'Estat à peine de nullité.

Bref l'equité de la cause conuie S. Majesté Tres-Chrestienne au recouurement des Grizons, l'asseuree benediction & fa-

neur du Ciel sur vn si iuste exploit contre l'iniuste detention, l'interest de sa propre dignité & reputation, la grandeur de la conqueste pour les infinies & grandes consequēces de toute la Chrestienté, l'opportunité & rencontre du temps qui tient les ennemis empeschez autre part, la facilité de l'entreprise, n'y ayant point encor pour le present de fortifications qui soyent considerables, lesquelles autrement estant acheuees comme ils desseignent, veu l'assiete des lieux & la qualité des passages, dans peu de temps se rendroient inexpugnables.

Le nombre de ceux qui ont mieux aimé absenter le pays & abandonner leurs maisons & commoditez particulieres, que de s'assuiettir à vne si inique oppression contre leur liberté naturelle de corps & d'esprit & se desunir de la Couronne Treschrestienne, monte à plus de 1500. personnes, & entre iceux se trouue vn bon nombre des plus sinceres qui estoient au gouuernement de la Republique.

En fin tous les peuples qui restent au pays gemissants & lamentans leurs grands malheurs appellant S.M. & la conuiant par

des soupirs secrets comme leur vnique
protecteur.

En consideration dequoy , si sa Maiesté
prend la deffense de la tres-iuste cause de
cette nation tant affligee & desolee sa con-
federee & tres affidee , & la retire par sa
puissance du fascheux labyrinthe où elle se
trouue, elle aura iuste suiet de le recognoi-
stre pour son Libérateur , Si fera chose di-
gne de sa grandeur , & immortalisera sa
gloire en la memoire des viuans.

F I N.

11

